

ARUBA

Gran músiko rubiano ta haña rekonosimentu pa su legado:

CAYA HILDWARD CROES ta bira realidat

ORANJESTAD -- Djaweps último a desvelá e kaya ku a haña nòmber di un gran músiko Arubiano, señor Hilward Croes den felis memoria. Promé Minister na e okashon a ekspresá bunita palabranan di forsa na famianan presente i den su diskurso el a enfatisá e legado musikal ku Hilward Croes a laga atras.

“Ta práktikamente imposibel menshoná e palabra ‘MUZIK’ sin pensa riba Hildward Croes. Manera su letranan mes ta bisa: ‘Music is we language. Music is we living wage. Music is we bondage. Music is we iron cage. Music is we bandage. Music is we beverage. Music is we message....’.

Si para ketu un ratu na e skohensia di e palabranan aki, e ta un refleho di kon profundo músika a biba den su alma i ser. Músika tabata

su amor. Músika tabata su pasion. Músika tabata su konsuelo. Músika tabata su determinashon. Músika tabata su aliento. Músika tabata su animo. Músika tabata.... su bida.

Hildward ku músika tabata unu. Un talento asina grandi ku wak bèk riba su trayektoria, ta realisá ku su talento tabata un don di Dios ku Hildward a haña komo bendishon.

Aruba a keda chikitu pa Hildward su talento. No a tarda hopi ku artistanan di taya internashonal a tende di Hildward Croes. Esaki a kondusí Hildward na kompañia artistanan manera Wilfrido Vargas i Juan Luis Guerra riba tarimanan internashonal, rònt mundu, dilanti públiko di mñes i miles di hende.

Komo sifuera poko: Hildward Croes a risibi e

premio maksimo den mundu di músika internashonal: awe Aruba tin un GRAMMY na su nòmber danki na Hildward Croes.

Sierto momento den su karera internashonal, el a kuminsá haña nostalgia pa su hogar Aruba i Hildward a bolbe bèk i na e momento oportuno. Ta yam’e destino. Betico Croes ta fayesé i Hildward ta gara e bandera musical di Betico i su grupo. Awe hunto ku Grupo di Betico el a mantené tradishon di dande i fin di aña bibu.

Hildward su kontribushon na nos kultura rubiano tabata grandi i diverso. Su talento musikal tabata asina dinámiko ku den tur género el a kosecha eksito. Hildward su vishon musical tabata hopi adelantá i ambisioso. Esaki a hasi ku el a sa di distinguí su mes komo

e kreador di un género musical ku e ta introdusí den Aruba su Karnaval: e asina yama *soca trance*. Un género ku a kousa furor bou dje hóbennan i konmashon bou di e grandinan. Awe ku orguyo por bisa ku su legado ku `Dushi Band` ta graba den historia musical di Aruba su Karnaval pa

semper.

Lástimamente bida a result’e demasiado kòrtiko i no a logra konkretisá tur su metanan.

Hildward a laga atras un herensia musical riku i Gobierno di Aruba ta inmortalisá su legado inougurando Caya Hildward Croes, na su kas na Cumana.

